

CLAUSURA DAS XORNADAS SOBRE OS INCENDIOS FORESTAIS EN GALIZA

Alfredo Suárez Canal
Consellería do Medio Rural

Director xeral de Montes, alcaldes e representacións que nos acompañan, señoras e señores:

As xornadas sobre os incendios forestais en Galiza, organizadas polo Consello da Cultura Galega, serviron para a posta en común do sentimento colectivo da sociedade galega da necesidade de mellorar os sistemas de prevención e de extinción dos lumes que azoutan cada ano o noso país.

As causas ecolóxicas dos incendios, os efectos sobre as explotacións forestais, a atribución da causalidade ás estruturas socioeconómicas e a problemática dos incendiarios foron algúns dos temas analizados neste foro por especialistas na materia. Ademais, sinalouse a necesidade dunha nova política agraria e forestal, a rexeneración dos ecosistemas e o aproveitamento sustentable dos recursos como algunhas das propostas para contribuír a evitar os lumes forestais.

O sector agrogandeiro e forestal, inserido no ámbito rural, padeceu en Galiza unha transformación nas últimas décadas con procesos de carácter estrutural que pasaron polo abandono das producións, o avellentamento da poboación, a subexplotación ou mesmo o cambio de uso da terra. Isto provocou a fraxilidade e o debilitamento dun sector que desde a Consellería do Medio Rural debemos fomentar, por consideralo de interese estratéxico para o País, con políticas incentivadoras de fixación de mozos no rural que perciban rendas dignas por desenvolveren o seu labor e defendan o coidado do bosque nas súas funcións social, produtiva e ecolóxica.

A xestión forestal sustentable, que garanta a multifuncionalidade do monte galego, ten que se desenvolver dunha forma respectuosa co medio natural, procurar a rendibilidade económica e social e, ademais, marcar o camiño do futuro dos nosos bos-

ques. Para a posta en valor do medio rural débense dar a coñecer as súas potencialidades e, por este motivo, considérase un factor clave a axeitada formación e a inculcación do respecto e coidado do medio natural.

A Consellaría do Medio Rural é consciente destes cambios acontecidos na sociedade galega e dos fenómenos que xorden como desencadeantes deste proceso evolutivo negativo, nos que se inclúen os incendios forestais. O lume como elemento de control estivo sempre ligado á actividade agrogandeira e forestal, pero os tempos mudaron e as transformacións xurdidas no medio rural, dada a complexidade da estrutura social e territorial, conduce á Consellaría do Medio Rural a darlle un xiro á política contraincendios co obxectivo de pór en valor os sistemas agrarios, coa aplicación das medidas necesarias para protexer o sustento económico, social e ambiental de todos os axentes implicados no desenvolvemento integrado do medio rural.

A Consellaría do Medio Rural quere realizar un tratamento integrador no que respecta á prevención dos incendios forestais co compromiso de implicar a todos os axentes nunha mesma responsabilidade compartida. O programa de prevención e defensa contra os incendios forestais para o ano 2006 desenvolverá accións de valorización e coidado do monte e loita contra o lume na procura de reducir os danos ecolóxicos, económicos e sociais causados polos incendios no noso país.

Os fondos do Goberno galego destinados á prevención e extinción incrementaranse no vindeiro exercicio nun 11%. Así, a Consellaría do Medio Rural destinará en 2006 preto de 70 millóns de euros ao plan de prevención e extinción de lumes.

No vindeiro ano implementaranse un Plan de prevención de incendios con accións dirixidas á poboación mediante a participación activa da sociedade na prevención do lume, con programas específicos de formación e de investigación. Este plan disporá, ademais, de actuacións concretas sobre o terreo co fin de realizar un tratamento integral en determinadas zonas mediante a ordenación, o aproveitamento forestal e a creación de pasteiros, entre outras medidas.

Manterase tamén o Plan de extinción, que desenvolve accións relacionadas co operativo de extinción terrestre e aéreo, mediante o establecemento de protocolos de funcionamento de todos os medios implicados, tanto da Administración autonómica como da local, baixo un mando único.

A actuación en materia de prevención de incendios forestais sobre o monte galego porá en marcha un conxunto de accións dirixidas directamente aos terreos forestais que atenúen o risco de incendios, entre as que se poden destacar a planificación de infraestruturas tales como sendas, pistas, devasas, depósitos de auga, ordenación dos usos do monte; a definición de zonas de seguridade libres de matogueira preto das zonas habitadas ou mesmo a restauración das zonas degradadas polos incendios forestais. Preténdese tamén a integración dun deseño de política forestal racional, baseada na diversidade de especies arbóreas acordes co desenvolvemento rural.

Despois destas pinceladas do que será a nova política contra incendios do Goberno galego, quero transmitirvos nesta intervención de clausura das xornadas a importancia da organización deste foro de debate, así como a miña consideración cara aos organizadores e relatores pola súa contribución ao estudo e xestión ligados á problemática social, económica e ambiental que provocan os incendios forestais.



Plácido Baamonde, Alberte Blanco Casal, Alfredo Suárez Canal, Francisco Díaz-Fierros. Clausura das Xornadas.